



La casa Carigiet a Trun duei buca restar ina ruina, anzi, l'uniun Trun Cultura vul cumprar e nezegiar ella sco center d'art e cultura. FOTOS A. BEELI/MAD



Incumbensai d'examinar ina reconstrucziun: Peter Fischer, Lisa Schmidt-Candinas, Simon Berger, Remo Derungs, Thomas Imboden e Kajo Bächle (da sen.).

Moviment ella muschna

DAD AUGUSTIN BEELI / FMR

■ **Gievgia sera han interessents agl art e cultura dalla vischnaunca da Trun fundau ina nov'uniun. Quella vul segirar la substanzia dalla casa paterna dad Alois e Zarli Carigiet.** Ils 19 da fevver 2020 ha in incendi devastau la casa Carigiet a Trun. Il baghetg, situau gest sper la baselgia parochiala, ei prest in onn suenter aunc adina ina ruina. Sper il fiug ed il fem ha l'aua da stizzar devastau totalme in la casa historica. 250 onns suenter sia construcziun eis ella buca pli habitabla ed ei ina muschna.

Per garantir la segirtad e schurmegiar ils mirs ha la casa senza tetg retschert il november vargau in palancau.

La reconstrucziun ei denton aunc buc en vesta. A lunga vesta duei quei denton schabegiar, culla cundiziun ch'ei gartegi da garantir las finanzas. Gievgia sera han interessents alla cultura, da cuminonza cun descendents dad Alois e Zarli Carigiet, fundau l'uniun «Trun Cultura». Quella vul s'engaschar per quei scop. *Domenica Carigiet*, feglia dil pictur artist, e *Toni Carigiet*, fegl dil cabarettist ed actur Zarli, han surpriu il co-presidi. Els dus fan denton buca part dalla cuminonza da proprietaris dalla casa destruida. Ina cumissiuon accumpignonta dalla nov'uniun ha gia entschiet cullas lavurs d'examinar las pusseivladads per ina reconstrucziun. Commembers da quella ein *Peter Fischer*, anteriur menader dil center da cultura

Paul Klee a Berna, e *Simon Berger*, il menader dalla Tgira da monuments dil cantun Grischun. *Remo Derungs*, curatur dalla Casa melna da Flem, e *Thomas Imboden*, manager da cultura ed involviu fermame in el project «Ogna», sco era *Kajo Bächle*, proprietari d'in'agentura da publicitad a Cuera, ein ulteriurs commembers. L'indigena *Lisa Schmidt-Candinas* cumpletescha la squadra dall'uniun Trun Cultura. Sco quei che quella ha communicau gievgia allas medias han ins pliras finamiras: Cun in'empre pass vul l'uniun rimnar daners per cumprar la casa devastada. Il prezi ei indicau cun 250 000 francs. Prioritad ha actualme in studi per surdar il baghetg reconstrui ad in intent public. L'idea fuss da scaffir

in center d'art e cultura nua ch'ins sa presentar ovras buca mo dad Alois Carigiet, mobein era d'auters artists enconuschents da Trun e dalla regiun. Per saver realisar ses plans sto l'uniun rimnar tochen la fin da settember 2020 ina summa totala da 370 000 francs. Trun Cultura ha denton aunc in'ulteriura finamira: Ella vul cumprar la casa Desax, ina casa historica ch'ei renovada ed en bien stan. Quella duei cumpletar ils baghetgs historics nezegiai per art e cultura.

L'uniun accentuescha ch'ella vegli buc esser ina concurrenza tiel Museum sursilvan Cuort Ligia Grischa, mobein ch'ins aspiraschi ina buna e fritgeivla col-laboraziun en favur da Trun e dall'entira regiun.

■ SEDRUN/MUSTÉR

Las pendicularas recloman

(fmr/abc) Las pendicularas da Sedrun-Andermatt e da Mustér critichesch la decisiun da transformar l'organisasiun turistica en ina societad acziunaria. Tenor igl exempel dad autras destinaziuns turisticas duei l'uniun che venda la destinaziun survegnir ina nova structura. Las pendicularas critichesch ussa ch'ellas, sco acturas impurtontas, vegnien alla cuorta e seigien buca representadas adequatame in. Cun representants dallas vischnauncas resti la societad acziunaria influenzada memia ferm dil maun public. La nova societad anonima vegni vivon controllada dalla politica. In punct dalla critica ei che las vischnauncas imponan la taxa turistica e drovan quella buc el senn dallas pendicularas. En in rapport dad RTR da sonda refusa il president communal da Mustér, *Robert Cajacob*, las reproschas.

■ LUMNEZIA

Problems cun radio UKW ein sligiai

(rtr/fmr) L'jamna vargada ha in defect dall'antenna da radio sil Péz Mundaun caschunau problems da distribuir RTR sin apparats dad UKW ella Lumnezia. Radios cun sistem da DAB e DAB+ ein buca stai pertuccai.

La reit dad UKW vegn igl onn 2024 deactivada. Allora eis ei mo pli pusseivel da tedlar radio sin apparats da DAB e DAB+. Tenor las cefras digl Uffeci federal da communicaziun teidlan gia ussa mo pli 17% dalla populaziun sur la reit dad UKW.

Piruetas el Prau la Selva

Campionadi svizzer dils giuvenils da patinadi artistic a Flem

■ (fmr/abc) **Ella halla da glatsch a Flem treneschan regularme in 45 affons e giuvenils patinadi artistic. Vendergis tochen ier dumengia ein atletas ed atlets dall'entira Svizra s'entupai leu pil Campiunadi svizzer dils giuvenils.** Il club ei confruntaus cun in futur malsegir damai che la vischnaunca da Flem vulesse spazzar la halla da glatsch. Il menaschi seigi buca rentabels e caschuni alla vischnaunca mintg'onn deficit, argumteschan las autoritads. La suprastanza dil club fa dapi entgens onns tut ils sforzs per mussar tgei che Flem perdess sch'ins spazzass la halla da glatsch. Per exempel pernottaziuns da gliued che vegn regularme in e cuntinuadame in a Flem pervia dil patinadi artistic. Da vendergis tochen ier

dumengia ein varga 70 giuvenils separpai al Campiunadi svizzer.

Prerundas da qualificaziun

L'organisasiun tetgala svizra dil patinadi artistic, Swiss Ice Skating, ha surdau al Club da patinadi Flem quella concurrenza naziunala dalla categoria U14 ed U16. In comite cun *Caroline Gasser* da Glion alla testa ha organisau il campiadu a Flem. Sco ella ha getg alla FMR ei il club ferg engrazievels pil sustegn generus da sponsurs dalla regiun. Il Campiadu svizzer dils pigns ei staus a Ligiaun, quel dils juniors ei a Monthey el Valleis e quel dall'elita a Bienna. Per la participaziun al Campiadu dils giuvenils a Flem havevan buobs e mattatschas stuiu sequalifi-

car en prerundas els segments program cuort e program facultativ.

Da vendergis sera tochen ier han ins udiu ella halla dil Prau la Selva produczions elegantas cun musica ed admirau atletas ed atlets en bials costums. Patinadi artistic ei sault sil glatsch. Igl ei buc in sport da squadra. Giuvenils ambizius treneschan il bia persuls, els ston esser motivai e drovan temps pil trenament. Giu dalla tribuna han ils aspectaturs saviu mirar lur presentaziuns. Campiunessa svizra ella categoria U14 ei *Sophia Katerina Fraser* dil club da Dübendorf vegnida, secunda ei *Ophélie Clerc* da Verbier e tiarza *Anna Albisetti* da Ligiaun. Tiels buobs U16 ha *Aurélian Chervet* dil Club da patinadi Berna gudignau avon *Taigo Thomas Sakai* dil club da Winterthur e *Jayson Lambery* dad Yverdon. Els ein ils futurs *Stéphane Lambiel*, *Sarah Meier* ni *Denise Biellmann*. Nums famus ch'han representau cun grond success il patinadi artistic svizzer sin plaun internaziunal. Ils giuvenils ch'ei stai la fin d'jamna a Flem vulan contonscher quella finamira.

Patinadi artistic ei dapi prest 100 onns disciplina olimpica, igl ei in classic sport d'unviern. Senza halla da glatsch eis ei oz denton nunpusseivel da trenar. Semegliant sco in bogn cuvretg s'aua era ina halla da glatsch tier l'infrastructura d'ina destinaziun turistica che vul promover diversas disciplinas sportivas. Il Club da patinadi Surselva possibilitescha ad affons e giuvenils da trenar e s'anzar el sault sils scursalets. Il destin dalla halla da glatsch da Flem decida il pievel da Flem ils proxims meins. Il suveran sto prender posiziun tier in'iniziativa corrispundenta. Vegness il center da sport Prau la Selva spazzaus perdess il Club da patinadi Flem-Surselva siu dacasa, vischnaunca e regiun havessen ina purschida dameins.

Gliesta da rangaziun mira era www.swissiceskating.ch



Sil podest ella categoria U14 la victura *Sophia Katerina Fraser*, secunda *Ophélie Clerc* da Verbier e tiarza *Anna Albisetti* da Ligiaun. Seniester *René Bänziger*, il vicepresidente da Swiss Ice Skating, ed ina representanta dalla giuria. FOTO A. BEELI

72 uras pil clima

■ (fmr/abc) **Gievgia vargada ha l'acziun da 72 uras a Glion entschiet e la sonda eis ella ida a fin. Rodund 20 giuvenils ein separicipai.** 72 uras han varga 20 000 giuvenils ell'entira Svizra luvrau per in intent communizeivel. Cun varga 350 projects da tut gener han els vului sensibilisar per la lavur voluntaria. A Glion han cresmands e commembers dalla JuBla Surselva organisau in'acziun encunter il microplastic e per spargnar energia. En gruppas ein ils giuvenils sepostai all'entrada dils centers da cumpra da treis detaglists. Leu han els vului entrar en discuers culs consuments e decla-

rar daco ch'ins duess desister da tastgas e confecziuns da plastic. Els han offeriu 200 sacs da teila sils quals els havevan stampau in suget dil clima. Sco quei che *Benny Meier*, igl organisatur dall'acziun a Glion, ha confirmau han ils giuvenils saviu dar giu tut ils sacs. Ils consuments seigien stai fetg generus ed hagien mess ella cassa ina donaziun per ulteriurs projects. Lur acziun da 72 uras havevan ils giuvenils da Glion e contuorn entschiet en casa da scola. Els han fatg rundas tras las stanzas e controllau sch'apparats electronics seigien tschentai giu e sch'ins hagi serrau las finiastras.



La gruppa ch'ei stada en acziun il vendergis e la sonda a Glion avon treis centers da cumpra. MAD

FMR

FONDAZIUN
MEDIAS
RUMANTSCHAS